



FAFANA



Volana Novambra 2023 - Laharana 241 - Vidiny 1 000 Ariary

“...Soraty ny fahitana, ka ataovy velona tsara ny soratra eo amin’ny Fàfana, ...” Habakoka 2²

GAZETY AVOAKAN’NY FJKM ANKADIFOTSY ISAM-BOLANA

MTA ➤ 5

Hamarana ny fankalazana ny faha-35 taonany



FINARITRA !



Ry havana, mpiara-manompo
“Mangataka aho mba hambinina sy
ho salama amin’ny zavatra rehetra anie
hianao, tahaka ny hanambininanana ny fa-
nahiniao ihany.” III Jao 2

Amin’ny fifaliana lehibe no hiaraha-
bana anao indray tojo izao volana No-
vambra izao. Lohahevitra vaovao indray
no hiarahantsika mibanjina mandritra ity
volana ity dia ny hoe “Tsenao amin’ny fi-
haviany ny Tompo”. Ny fihaviany’ny
Tompo ambara eto dia ny Fihaviana am-
boninahitra sy amin-kery sy fahefana le-
hibe hitsena sy handray ny mino ho any
Amisy. Io ilay fampakaram-badin’ny za-
nak’ondry (Apok 19:7). Nefy tsy izay
ihany fa ilay tena Fihaviana naha mpan-
jaka hitsara, hanavaka ny tsara sy ratsy,
ny Azy sy ny tsy Azy, ny manompo sy ny
tsy manompo Azy.

Fihaviana hanavaka tsara ho amin’ny
fiainana mandrakizay ary ny ratsy sy ny

“ Tsenao amin’ny fihaviany ny Tompo ”

tsy mino ho any amin’ny fahaverezana
mandrakizay.

Koa raha hitsena ny Tompo amin’ny
Fihaviany isika dia fara fahakeliny misy
Fiomanana telo tokony ho atao dia ny **Fi-
sasana na Fidiovana**, ny **Fiakanjona**
ary ny **Fiambenana**.

Ny **Fisasana** na ny Fidiovana, raha ho
avy ny Tompo ka hitsena azy isika dia
mila midio aloha. Mila mihavana
amin’ny Tompo isika ka mibebaka
amin’ny ota natao, mahatsiaro ho tsy tan-
teraka isika, mpanota tsy mendrika eo
anatrehan’ny Tompo ka tsy maitsy
midio. Ny ran’ny Zanak’ondry no maha-
dio sy mahafaka ota antsika. Ny olona
madio sy vita Fihavanana amin’ny
Tompo no afaka hitsena azy am-bonina-
hitra ary ho mendrika ho amin’ny fampa-
karam-badin’ny zanak’ondry.

Ny **Fiakanjona** dia tena fianjai-
kan’ny olona mendrika ho amin’ny fam-
pakaram-bady Mat 22:11-12. Tena
mariky ny fanajana ny fampakaram-bady
ny fitafiana mendrika ny amin’izay Jesoa
Kristy no fitafiana tsara indrindra fa hoy
ny soratra masina «Fa itafio Jesoa Kristy
Tompo» Rom 13:14. Mila mitafy ny toe-
panahy araka an’Andriamanitra isika, dia
araka ny fitarehan’ny Fanahy Masina mi-
tafy ny famindrampon’Andriamanitra ary
sikino fahamarinana ny valahanareo, ary
mitafia rariny ho fiarovan-tratra ary kir-
roy fahavononam-panahy avy amin’ny fi-
lazantsaran’ny fihavanana ny tongotra reo

Efe 6:14-15. Aoka hitafy ny fahafe-
noan’ny fanahy masina isika, dia ireo vo-
katry ny Fanahy, ny Fitiavana, Fifaliana,
Fiadanana, Fahari-po, fahamoram-pa-
nahy, fanaovantsoa, fahamarinana, faha-
lemen-panahy, fahanonam-po (Gal 5:22).

Ny **Fiambenana**, tena tsy afaka mi-
saraka amin’ny Fiomanana eo amin’ny
fitsenana ny Tompo amin’ny Fihaviany
ny fiambenana. Mila miambina mandra-
kariva isika. Tsy fiezahana hamantatra
ireo famantaranana ny Fihaviany no zava-
dehibe fa ny fiomanana sy fiambenana
mandrakariva, mba tsy hahatampoka ny
Fihaviany na rahoviana na rahoviana na
amin’ny ora fahafiry na ora fahafiry dia
mila miambina mandrakariva isika. Ny
fiambenana tsara dia tsy maitsy miaraka
amin’ny famakiana ny Tenin’Andriamanitra
sy ny vavaka ary ny fiainam-pide-
rana Azy. Tsy manome fitoerana ny
Devoly fa mila miambina mandrakariva.
Koa vonona mandrakariva ary isika hitsena
ny Fihaviany’ny Tompontsika ka ifoha,
ibebeaka ny ota natao, mba ho vita
Fihavanana aminy isika, ka itafio avokoa
ny fitafiana maha mendrika antsika eo
anatrehan’ny mihabana sy mivonona
mandrakariva mba tsy hahatampoka Antsi-
ka ny Fihaviany. Ary raha tonga Izy hitsena
sy handray antsika amin’ny Tenin’-pahefana
hoe : “Ry Mpanompo
tsara sady Mahatoky, midira amin’ny fi-
falian’ny Tomponao”.

Ny mpitandrina Ravaloson

FIAINAM-PIANGONANA ➤ 3

Herinandron’ny Sampana Fifohazana



FIANJAIKA ➤ 4

Kapakapa



FIAINAM-PIANGONANA ➤ 3

FJKM Ambodivonkely Fanavaozana Mankalaza an’Andriamanitra noho ny faha-10 taonany



Sampana Fifohazana Fanokanana mpiandry

Mitombo isa hatrany ireo olona vonona hanolotena hanao ny adidy masina eo anivon'ny fiangonana. Anisan'izany ireto vao navokan'ny SEFALA eto anivon'ny synodam-paritany Iarivo Avaradrano izay notokanana teny amin'ny Fofikri Ilafy ny sabotsy 7 Oktobra.

107 mianadahy ireo mpiandry notokanana ato amin'ny SPIA-19 ny sabotsy 7 Oktobra 2023 teny amin'ny FOFIKRI Ilafy, nitondra ny anarana Andiany « Tsara Fiorenena », ka 5 mirahavavy avy ato amin'ny Sampana Fifohazana Ankadifotsy, dia:

- Nenitoa RAZAIARINTSA-LAMA Felantsoa
- Nenitoa RAHARIMAHEFA Haingo Malala
- Nenitoa RAMIANDRISOA Salohy Harifera
- Nenitoa RAVELONJANA-HARY Herilova
- Nenitoa RAKOTOHARI-VOLOLONA Zanoelisoa Holy Lala

Nisy ny filaharambe niainga tao amin'ny FJKM Ankadikely Ilafy nihazo ny FOFIKRI ILAFY, niarahana tamin'ireo raiamandreny mpiandrina, raiamandrenin'ny Toby Fampiraiana, Ambohijanaka Ilafy sy ny biraon'ny Toby ary ireo mpiandry zoky.

Ny mpitandrina Burleg Joseph no nitarika ny fotoana, Atoa ROBSON Rado Lalaina Johary, mpitandrina, Tonian'ny Departemantan'ny fiangonana kosa no nitondra ny hafatra izay nalaina tao amin'ny filazantsara masina araka an'i Matio 10: 2 - 12.

Nambarany tamin'izany fa ny fiorenana ao amin'ny Jesoa Kristy no mahatsara fiorenana: miorina amin'ny firenoana an'i Jesoa Kristy



Tompo ; miorina amin'ny asam-pamonjena notanterahan'i Jesoa Kristy ; miorina amin'ny fomba fiaina sy ny soatoavina napetrak'i Jesoa Kristy. Koa ianao izay notson-gaina tao anatin'ny maro, nomeny fahefana hamoaka fanahy maloto, hanasitrana aretina dia tsarovy fa fantatry ny Tompo ianao. Ataony ao anaty andiany ianao mba hiova, hiorina tsara, hifanantara, hifanoro, hifampiteny, hiaraka hanatanteraka ny bai-kon'ny Tompo sy hampan-droso ny asany.

Ny tsara fiorenana dia nomen'ny Tompo toromarika mazava. Mihaino sy maha-

fantatra ny asa sy iraka ampanao. Izay efa notante-rain'ny Tompo, efa nampianariny, efa fantany fa vitantsika no anirahany antisika. Am-pitiavana, tsy misy takalony, tsy miankina amin'ny fananana ny asa fa miankina amin'ny finoana izay efa nasehon'i Jesoa taminao, fiaianam-bavaka mba hahefa ny asa, feno fahamasinana. Mila mitadidy sy mampihatra izay natolotra sy nampiorenana. Miaina sy mivelona tsara ao amin'ny fiangonana, Sampana, Synodam-paritany fa misy toromarika omen'ny Tompo ombieny ombieny amin'ny

alalan'ny fiofanana sy fam-pianarana. Ary mampaha-fantatra ny tenany hatrany ny Tompo amin'ny alalan'ny mpanompony.

Farany, nohamafisiny fa tsy tanjona ny mpiandry, fa dingana anatanterahana ny Tenin' Andriamanitra.

Taorian'ny fanokanana dia nanatanteraka asa sy fam-paherezana avy hatrany ireto andiany Tsara Fiorenana ireto.

Ny Alahadin'ny Sampana Fifohazana eto amin'ny sahan'ny FJKM no noraisin-tanana tato amin'ny fiangonana izy 5 mirahavavy.

Harilalaina A.

AFF SPIA Fivoriambe tao amin'ny FJKM Manarintsoa Namehana Rasalama Martiora



tra ho AFF.

“Izaho no mpianatra ary mampita ny fahaizana azoko amin'ny hafa”. Mila mame-traka tetik’ady ny AFF mba ahafahana miasa ka hisy vokatra. Lio 9: 57-62, “rehefa Jesoa no miantso dia olona sahirana no mamaly izany hoe: mandeha any amin'ny olona mila famonjena sy mila vonjy izany, rehefa antsoina”. Manao ahoana ny manodidina misy anao ? Inona ny

asan'ny AFF amin'ireny olona mila vonjy ireny ?. Mila fahaiza-manao ny fito-riana Filazantsara, sao tsy mandray aim-panahy ilay olona. Tokony ho hita amintsika AFF ilay Andriamanitra manjaka ao anatintsika. Ny olona irahina dia olona hanambara ny fanjakany, koa ampanjakao Andriamanitra amin'ny fiafana iray manontolo. Rehefa mivory anaty sampana isika, dia ataovy taona manaraka.

Ianja R

NY BAIBOLY INDRAY MIELATRA

Epistily nosoratan' i Jaona

Misy 3 ireo Epistily nosoratan'ny Apostoly Jaona ankoatra ny Filazantsara fahefatra sy ny bokin'ny Apokalyps.

Ny mampiavaka ireto epistily ireto dia misy hevitra maro miverimberina ao anatiny. Tsy dia voafaritra mazava kosa anefa ny hanoratan'ny Apostoly ity taratasy ity. Voasoratra teo anelanelan'ny taona 85-90 AD tany Efesosy izy ireo.

Jaona I

Mitovitovy amin'ny Filazantsara araka an'i Jaona ny endriny sy ny vontoatiny, manambara ny fifandraisana amin'Andriamanitra Ray, fifandraisana amin' Jesoa kristy ary ny fifandraisana amin'ny namana. Voamarika ao koa ny fampitandremana amin'ireo fampianarana sandoka. Miverimberina ao ny hoe: «Andriamanitra dia fahazavana, Jesoa no famonjena ho an'izao tontolo izao»...

Fizaran'ny boky :

Toko


- 1-2: ny fiombonan'ny mpino Kristianina amin' Andriamanitra.
- 3-4: 6 Ny fanoavan'ny Kristianina ny sitrapon'ny Ray sy ny fifankatiavan'ny samy mpino.

Nanangona fifiav

TSY HARITRA

Ramiaramila...

Efa iaraha-mahalala ny andraikitra sahanin'ny mpitandro filaminana : miaro ny vahoaka sy ny fananany, ary koa mitandro ny filaminana, ny fifamoivoi-zana, ny fitoniana, miady amin'ny herisetra isan-karazany, amin'ny zavamahadomelina sns...



araka ny vondron-tafika misy azy avy. Fa etsy andanin'izay, dia mian-draikitra asa sosialy isan-karazany ihany koa ny mpitandro filaminana, toy ny vonjitalitra, ny fampiana ny mpiara-belona tra-pahasiranana, ny famonjena olona tra-doza sy traboina... Izany indrindra no ataon'ireto andiana miaramila iray any am-pita any. Mandry eo ambony tetezana tady iray izy ireto, mba ahafahan'ny ankizy miampita ity renirano misamboaravoara be ! « Adidy masina atao amin'ny mpiara-belona » no azo ilazana izao, raha neverintsika fa tra-doza ity tanana iray noho ny rivodoza sy tondradrano, ka tsy afaka miampita intsony ireto olona ireto satria nopaohan'ny rano ny tetezana. Mafy izany voahitsakitsaky ny olona izany, kanefa tsy nihemotra ireto miaramila ireto, fa nenenjan-tsandry sy ranjo mba hanampiana ny mpiara-be-lona aminy. Ny miaramila rehetra va re no hanaiky hanao izany ?...

FANTARO

i Baraka

Lehilahy Israelita i Baraka, zanakalahin'i Abinoama. Sahy namaky ady tamin'i Sisera mpanjakan'i Syria rehefa naangona olona 10.000 teo ambany fitarihan'i Debora mpaminany vavy izaynofidian' Andriamanitra hitarika ny zanak'Israely raha niady tamin'ny fahavalony dia ny kananeana, izy ireo tamin'izany. Mpits.4

Na dia malaza amin'ny fiteny aza ny hoe «afabaraka» dia voatanisa ho anisan'ny olon'ny finoana miaraka amin-dr'i Gideona sy Samsona kosa i Baraka any amin'ny Heb.11: 32.

Nanangona fifiav

Herinandron'ny Sampana Fifohazana

Hetsika nakotrokotroka nandritra ny herinandro no nanamarahan'ny sampana fifohazana ny herinandron'ny sampana teto amin'ny fitandremana Ankadifotsy. Fampianarana nentin'ireo Raiamandreny am-panahy, nofaranana tamin'ny fiderana ny alahady hariva.

Ny alatsinainy 16 Oktobra hatramin'ny alahady 22 Oktobra no nanaovana ny Herinandron'ny Sampana Fifohazana. Nanamarika izany ny Sampana ato amin'ny Fitandremana tamin'ny alalan'ny fampianarana ny alatsinainy sy talata ary alakamisy sy zoma, seho antschatra kosa ny alarobia ary asa sy fampaherezana no namarana izany ny alahady.

Nifandimby tamin'ny fampianarana : Atoa Ranomenjana-hary Soloforado Martial. Mpitandrina, Tonian'ny SaFiF, Atoa Ravaloson, Mpitandrina, Atoa Robson Rado Lalaina Juhary, Mpitandrina, Tonian'ny Departementan'ny fiangonana, Atoa Randriamanantena Solo Jean Jacques Séraphin, Mpitandrina, Tonian'ny Tily sy Mpamanava.

Lohahevitra dimy mifanaraka amin'ny Mofon'aina no nitondrana ny fampianarana.

***Aoreno ao amin'ny tempo ny fianakaviana (Malakia 2: 10-17)**

Ny hamerina ny vahoakan'Andriamanitra ho amin'ny fanompoana marina an'Andriamanitra, amin'ny maha Mpanjaka marina no tanjon'ny bokin'i Malakia. Ny fanamasiana ny fotora iorenan'ny fianakaviana no kinendry amin'izany.

Mba ho fianakaviana miombona amin'ny fanompoana an' Andriamanitra : Andriamanitra mampiray ny fianakaviana, mpiombona Ray isika ka tonga mpianakavin'ny finoana. Jesoa Kristy velona no mampiombona antsika amin' Andriamanitra sy isika samy isika. Izany no fianana sy fiombonana izany no manosika antsika hihavana amin'ny olona rehetra.

Fianakaviana miavaka satria manana sy misy an'Andriamanitra ao amin'ny fiaianany. Miantomboka amin'ny fanamasinana ny fanambadiana, fanamarinana amin'ny maha kristiana ary izany dia varavarana idiran' Andriamanitra ao an-tokantrano. Ny tsirairay ao an-tokantrano dia tokony hahatsapa fa ao Andriamanitra.

Mba ho fianakaviana mpankatò: ny tena tian' Andriamanitra dia ny zanany mankatò Azy, koa mamita-tena izay mihaiho fotosy ihany fa tsy manatanteraka ny sitrapon' Andriamanitra. Koa folahy ny fianakaviana hihaino sy hankatò an' Andriamanitra mba ho fianakaviana tsy misy fitaka sy lainga fa halan' Andriamanitra ny lainga, ary misy asa atao' Andriamanitra amin'izay halany, dia fandringanana. Tsy misy fianakaviana tafta amin'ny lainga sy fitaka .

***Aoreno ao amin'ny tempo ny fanambadiana (Marka 12 : 18-27)**

Ny fanambadian'ny lahy sy vavy dia fiarohana mibanjina ny fiaianana mandrakizay. Koa tsarroy fa ao anatin'ny faharian' Andriamanitra ny fanambadiana. Fantatr' Andriamanitra fa tsy tsara raha irery ralehilahy ka nanamboarany vady sahaza azy (Gen 2 : 18) ; vady afaka mifameno, mifanampy,



Takarivam-piderana namaranana ny herinandron'ny SAFIF
ny alahady 22 oktoba 2023

mifanohana, hanatsara Anao. Tsy karohana na tadiavina fa ato-lotr' Andriamanitra. Koa angataho amin' Andriamanitra fa efa manana izay voaomana ho anao Izy, ary izay efa manana, io ilay fanomezana sarobidy nomen' Andriamanitra anao.

Manaraka izany, aoka ny tsirairay ao an-tokantrano hi-fandray amin' Andriamanitra, amin'ny alalan'ny vavaka. Fa indro mandondona ao am-baravarana Izy ka miandry anao hamoha. Miandry izay hanokafanay no fono handray Azy mba hanjakany eo amin'ny fiaianana. Koa meteza ho anko-honana modely amin'ny fanompoana an' Andriamanitra.

Mitaona antsika ho tsara fandidrasana ao anatin'ny tokantrano ny fifaneraserana salama, ny fiombonam-pihetseham-po, ny fahafahana maneho hevitra, ny fangaraharana.

Koa aoka hifampihaino sy hifanampy. Ny fandeferanao sy ny fifamelana heloka dia mitondra fihavaozana ao an-tokantrano indrindra ho an'izay efa nandray ny Tompo. Ary koa mahaiza mifanitsy am-pitiavana, ary karohy izay fanehoam-pitiavana azonao atao. Mahaiza mifampahery, fa be fahavaloo ny tokantrano. Mba hanaingana ny mahaizy azy ny tsirairay dia aoka samy handray anjara amin'ny raharaha ao an-tokantrano ny mpianakavy. Farany, tokantrano miara-manompo an' Andriamanitra no sitrak' Andriamanitra. (Rom 12: 11)

***Aoreno ao amin'ny Tempo ny fiteizana ny taranaka (Ohabolana 3: 1-12)**

Sarobidy amin' Andriamanitra ny zanakao koa taomy izy hiaina ny sitrapon' Andriamanitra. Aoka ho fianakaviana manana fahatokiana an' Andriamanitra. Ho fianakaviana maharitra amin'ny fananaran'ny Tompo.

Seho an -tsehatra izay nanehoana ny maha fifohazana, ny fananarana ny tanora ny amin'izao fiaianana izao, fiaomana ny zoky, zandry, hivavaka. Ary indrindra, fiderana sy fisaorana an' Andriamanitra.

***Aoreno ao amin'ny Tempo ny famelomanao ny an-kohonanao (Hebreo 13: 4 - 7)**

Aoreno ao amin'ny Tompo ny tontolo ivelomanao sy amelo-

mana izay misy ny ankohonana. Ataovy ho zava-dehibe ny sakafon'ny fo, fanahy, saina, vatana.

Fo: atolory ny Tompo ny fonao. Mijery ny fitiavan' Andriamanitra mba ahazoana mafatsapa fa tiana ianao. Fitiavana mikendry ny mandrakizay. Mitondra fitiavana ao an-tokantrano

Fanahy: Ny fanahy manohitra ny nofo. Nomen'ny Tompo ny Fanahy Masina isika tamin'ny alalan'ny batista, ny fmetrahan-tanana koa manatona ny fiangonana, Mihainoa ny tenin' Andriamanitra mba hitomboana amin'ny finoana. Fifaneraserana amin' Andriamanitra amin'ny alalan'ny vavaka.

Saina: mila mianatra isika hamelomana ny saina. Fantaro ny toerana anovozañ'ny zanakao fahalalana, ny mpira-mianatra, ny mpanabe ao.

Sakafo : sakafo mahavelona, mifanaraka amin'izay azo hohina no hano mba ho tonga hery.

Famelomana hiteraka fiaianana dia fiaianana mandrakizay. Ny sakafon'ny zanak' Andriamanitra dia ny tenin' Andriamanitra koa aza atao ambanin-javatra ny fampianarana Sekoly Alahady ny zanana. Zanaka mijoro amin'ny fitiavana an' Andriamanitra.

***Aoreno ao amin'ny tempo ny fanabeazana ny taranaka (Lioka 2: 39-52)**

Maro ny zava-misy eo amin'ny fiafahana-monina toy ny fandrosoana ara-teknolojia; mibahan-tierana ny fanatontoana, toa tsy misandraika amin'ny fiafahana ny tanora ankehitriny ny fiaianana ny Ray amin-dReny; valin-teny miteraka aretim-po ho an'ny Ray amin-dReny no avalin' ny zanaka ny ray amin-dReny; zary fomba fanao sy mahazatra ny tanora ary tsy mahaizy azy ny mahita Ray amin-dReny miasa irety na sahariana ka tokony hampiana fa je-reny fotosy; manjaka ny fitokana-monina.

Saino kely anie ireo ankizy samy manana finday ary samy miondraka mijery izany. Ray amin-dReny samy manana izay itondrany ny zanany, samy sahariana amin'izay alehany, hany ka tafintohina mianjera ilay zanaka. Aiza ny maha izy ny Ray amin-dReny ao an-tokantrano ? Heno-in-teny ve? Mananatra ve?

Ny fiangonana kosa dia mijoro mitondra ny anjarany

amin'ny fanabeazana toy ny fampianarana Sekoly Alahady, ny fananganana ireo Sampana sy seha-pitaizana manabe ankizy sy tanora; mandray fanapahan-kevitra amin'ny rafitra ambony ho an'ny fiaianam-pianakaviana kristiana ary mamoaka boky misy fanabeazana ny tanora. Manome andraikitra ny tanora amin'ny sehatra sy ny rafitry ny fiangonana, mampifandray ny ankizy sy ny tanora amin'ny sehatra iraisampirenena kristiana sy fandefasana tanora ho amin'ny iraka fitoriana ny Filazantsara

Ny Soratra Masina ihany nefy mampitombo ny fahendrena aobamin'izy ireny. Ray amin-dReny fitaratra amin'ny fivavahana, ny fanarahana ny fiaianam-pivavahana fitiavana ny fiangonana, ka atao izay hahatamana sy han-kamamiany ary andaniany ny androny ao an-tranon-dRay. Mba ho tia fampianarana sy ny toro-hevitra ary manaja ireo olon-dehibe. Ray amin-dReny mitempo fitiavana ho an'ny zanany. Zanaka mijoro amin'ny fitiavana an' Andriamanitra.

Koa toroy sy avelao hanatona an'i Jesoa ny zanaka, ampiarano fahendrena sy fahalalana tsara, meteza ho Ray sy Reny filamatra. Tezao amin'ny fiaianam-bavaka sy dinika mampandroso sy mahasoa ny zanaka. Ray amin-dReny sy zanaka mahay mifampihaino sy mandatsaka am-po ny tena fitiavana marina Izy an' Andriamanitra tao amin'i Jesoa Kristy.

Ny alahady 23 Oktobra, no nandrainan-tanana azy dimy mihaino, mafitsy am-pitiavana, ary karohy izay fanehoam-pitiavana azonao atao. Mahaiza mifampahery, fa be fahavaloo ny tokantrano. Mba hanaingana ny mahaizy azy ny tsirairay dia aoka samy handray anjara amin'ny raharaha ao an-tokantrano ny mpianakavy. Farany, tokantrano miara-manompo an' Andriamanitra no sitrak' Andriamanitra. (Rom 12: 11)

Ny hanomezana fanampim-pahalalana ho an'ny mpivady, izay tsy fantany talohan'ny fanambadiany, mba hampirindra ny fiaianan-tokantrano izay tena fototra sy antoky ny fahasambaran'ny zanany.

Harilalaina A.

Fivoriambe SPIA-19 Raha salama tsara ny Sekoly Alahady, dia ho salama tsara koa ny fianakaviana

Notanterahina ny Sabotsy 21 Oktobra 2023, teny amin'ny Kolejy Paul Minault Androhibe ny favoriamben'ny sampana Sekoly Alahady ato amin'ny SPIA 19. Manodidina ny 1 700 teo ny tonga teny an-toerana, 62 no avy eto amin'ny Fitandremana Ankadifotsy izay notarihan'ny Filohan'ny Sampana sy ny birao ary ny mpandrahara, nisy koa ireo Ray aman-dReny niaraka tamin'ny mpianatra.

Ny filohan'ny SA-SPIA, Atoa Randrianalidera Radoniriana Robin no nitarika sy nitondra ny hafatr' Andriamanitra, izay nalaina tao amin'ny bokin'ny Deuteronomia 13:7-9. Nasongadiny tamin'izany fa ny Sekoly Alahady no fototra iorenan'ny fianakaviana. Koa raha salama tsara ny Sekoly Alahady, dia ho salama tsara koa ny fianakaviana. Araka ny vina hoe : "Sekoly Alahady mandeha, tsotra, azo antoka, raitra".

SA.LA.MA.

SA: SAhia mijoro amin'ny finoana marina. Ny rahalahinao, ny iray tampo aminao, ny zanakao, ny vadinao, ny namanao, ny akaiky anao, miresaka tsotra aminao, milaza tsiambaratelo, amin'ny mangingina. Misy fotoana anampenana ny sofina, tsy handre izay fitaomana samihafa. "Hatrhy ny fony vao zaza ianao no efa nahalala ny Soratra Masina".

LA: LAvo ny fitaomana ho amin'ny ratsy. Raha taomin'ny mpanota ianao, azo mandeha.

MA: MAndosira ny fanompoan-tsampy. Mety banana endrika hafa ny sampy: vola, fotoana, fianarana, foto-kevitra. Aza mety hotitahina ianao.

TSA.RA

TSA : TSArovy mandrakariva ny didin' Andriamanitra. Efa afaka tamin'ny fahotana ianao ka nomena ny didy mba hiavahana amin'ny hafa.

RA : RAvo ny asan'ny maizina dia azo manaiky azy na mihaino azy ianao, ary azo mba iantranao izy.

Taorian'ny fanompoan-pivavahana dia nirosa tamin'ny fanantana samihafa ny fotoana. Toy ny "zumba", ny "question pour un chrétien", ny hirahira. Nisy koa ny lalao maro samihafa, ny "toboggan gonflable", ny "trampoline", ny jono tavoahangy, ny toraka baolina, ny basket.

Marihina fa isika avy eto amin'ny Fitandremana no nanatanteraka ny fanantana. Nisy koa ny fahatsiarovana nomena ireo mpandray anjara mendrika tamin'ny lalao sasany, toy ny "question pour un chrétien", ny jono tavoahangy, ny toraka baolina. Hafaliana no hita ratrata teny amin'ny rehetra rehefa namonjy ny fodiana.

"Raha mitaona anao mangingina ny rahalahinao, zanaky ny renainao, na ny zanakao-lahy, na ny zanakao-vavy, na ny vady andefimandrinao na ny sakaizanao izay toy ny ainao, ka manao hoe: Andeha isika hanompo andriamanitra (izay tsy fantatrao, na ny razanao) dia ny andriamanitra ny firenena izay manodidina anareo, na ny lavitra anao, hatramin'ny faran'ny tany rehetra), dia azo manaiky azy na mihaino azy ianao; ary azo mba iantran'ny masonao izy, na amindrano fo, na afeninao." Deuteronomia 13: 7-9

Harilalaina A.



Ireo solontenan'ny Sekoly Alahady namonjy ny Fivoriambe SPIA-19.

ANKIZY

Ny tanjon'ny sekoly ho an'ny ray aman-dreny

1. Ampitoviana fijery ny mpanabe any an-trano sy ny mpanabe any an-tsekoly, mba tsy hisian'ny familihana andraikitra eo amin'ny roa tonta, ary mba tsy hampiroarao saina ny zaza iarahany manabe.

2. Ampahafantarina ny Ray sy Reny niteraka fa ny "Ankohonana no sekoly voalohany indrindra" fa ny tompon'andraikitra voalohany amin'ny Fanabeazana dia ry zareo tsirairay avy. Noho izany tsy tokony hisy ny fahamihana ny adidy sy ny andraikitra momba izany.

3. Hanomezana fanampim-pahalalana ho an'ny mpivady, izay tsy fantany talohan'ny fanambadiany, mba hampirindra ny fiaianan-tokantrano izay tena fototra sy antoky ny fahasambaran'ny zanany.

("Sekoly ho an'ny Ray aman-dreny" "Ny Ankohonana no sekoly voalohany". Rasoanindrina Marguerite, Conseillère pédagogique, Psychothérapeute)

Tojo. R

TONONKALO

Tsarovy ary.

Sarobidy, Fahasoavana ny andro izay Mbola Omen'ny Tompo anao. Koa aza avela ho very maina Fa ampiasao izay Nitahiany anao Tsy maintsy hadinina ianao, Koa raha mbola eto an-tany Vitao ny adidy napetraka Aminao. Miorena amin'izany efa nampianarina anao Fa aza mety havilivily sy hivilivily Ka hierikerika ny amin'izay heverina ho tsara Tano mafy izay hanananao Mba tsy hisy haka ny satro-boninahitrapo Ary indrindra torio sy ambarao Ilay Filazantsara noraisinao.

Koa izao no hafatra amino : Miambena mba tsy ho solafaka ny dia Ka hihona amim-pifaliana indray ary, Satria ny tanjontsika, dia ny hiara-dia Hizotra ho aiza moa? Ho any amin'ilay lapa soa Tsy aiza fa ho any an-tanana.

RTH (Rakotoarivelox Tojo-Hery,
Alahady 10 septambra 2023, lora sy 30 mn)

MAZOTOA HOMANA

Salady kaonkaombra amin'ny yaourt

Zavatra ilaina ho an'olona 3 : Concombre 3 salantsalany, poivron 1, dipoavatra, sira, yaourt nature 1, ranona voasary makirana.

Fomba fikarakarana azy : Saso dia voaso ny kaonkaombra, dia tetebo boribory ary lomana sira vetivety. Saso ihany koa ny poivron ary tetebo efajoro. Afangaroy ao anaty lovia jobo ny yaourt, ny dipoavatra, ny ranona voasary makirana ary asio hanitra maitso araka izay tiana. Rehefa vita izay dia ario ny rano amin'ilay kaonkaombra ary atambaro izy rehetra.

Sakafo tena maivana amin'izao andro mafana dia mafana izao ity aroso anao ity, ka mazotoa homana indray àry !

R.Sidonie



MBA SAINO

Raha...

Rah'toa ianao mitia rongony, 'ndray andro any hitafy gony ; Ny hasinao izay ambony, Tsy ho tananao intsony !

Ny fifohana rongony, Mampiety ny efa ambony, Tsy mamela anao ho tony, Tsy mamela anao hamony !

Raha ataonao an-tsaina Ny ho avy andraindraina, Tsy ny hoe « hanamain », No hahatraranao maraina !

Koa tsinjovy ny ho avy, Ny tanaana aza araviravy, Ny tontolom-pianakavy Arovyo soa tsy hanavy !

Cairo, 30 march 2004
Docteur
RANDRIAMAHAZOSOA
Boanerjesy Olivier

Fianjaika



Kapa mihaja fitondra andavanandro

Tsotra kanefa mihaja ! Kapa natao ho an'ny andriambavilanitra rehetra amin'izao andro mafana izao. Tena manja !

Ireo otrikaina sy ireo singa mety ho hita ao amin'ny tantely :

A – B1, B2, B3, B5, B6, B8, B9 – C – Calcium – Cuivre – D – Fer – K – Magnesium – Manganese – Potassium – Phosphore – Sodium – Soufre – Zinc ...
Ireo soa azo avy amin'ny fihinanana tantely :

- Mampiakatra sy mampatanjaka ny hery fiarovana
- Mampatanjaka ny vatana
- Mitondra hery ho an'ny havizanana mandoalo
- Mampitsahatra ny kohaka sy ny tenda mamaivay
- Miaro amin'ny aretin'ny fo sy ny lalandrä
- Mampikatona ny fery sy manasitrana ny may
- Mampitony sy manatsara ny torimoso
- Manamandina sy mitondra fahatanorana ho an'ny hoditra
- Manatsara ny volo

Ny Tantely

- Manatsara ny fiasan'ny vavony
- Manasitrana ny aretim-bavony sy ny tsinay
- Manamora ny fivalanana

- Manatsara ny fitadidiana
- Manasitrana ny molotra vaki-vaky
- Manampy amin'ny fanalana menaka ratsy ao amin'ny vatana Mitondra hamamiana voajanhary ny tantely; Maro ireo soa entiny ho an'ny fahasalamana. Azo ikoloana endrika amam-bika ihany koa izy. Tsy tsara ho an'ny zaza latsaky ny herintaona anefa ny fihinanana azy. Ny tantely dia

vokatra sarobidy tonga dia vonona. Azo karakaraina amin'ny fomba isan-karazany izay itiavana azy. Koa araraoty ary ireo tombotsoa azo avy aminy mba hitondra soa ho anao.

Fanja Raveloariajona



FJKM Ambodivonkely Fanavaozana Mankalaza an'Andriamanitra noho ny faha-10 taonany

Amin'ny fomba manetriketrika lalandava no ankalazana ny tsingerintaona. Tsy latsa-danja amin'izany ny FJKM Ambodivonkely Fanavaozana.

Manangana faneva ho tangan'ny firenena" Isaia 62:10, io ny teny faneva nosafidian'ny FJKM Ambodivonkely Fanavaozana, ao anatin'izao fankalazana ny fahafolo taona niorenany izao. Ny alakamisy 12 Oktobra 2023 nanomboka tamin'ny 9 sasany maraina ny fotoam-pivavahana fisaorana sy fanamarihana izany jobily izany tany an-toerana.

26 ireo solotenan'ny fitandremana Ankadifotsy, notarihan'ny mpitandrina Ravaloson mivady sy ireo solotenan'ny biraom-piangonana. Nitarika ny fotoana Rtoa Ranarimalala Nirina Harisoa, mpitandrina, sady mpitantsoratra SPIA, ary nitondra ny Tenin'Andriamanitra kosa Atoa Andriananj Joseph, mpitandrina sady mpanolotsaina SPIA. Lalainao tao amin'Isaia 62:10-12, "Andriamanitra hiditra an-tsehatra ka hamerina ny olony ho amin'ny taniny ka ho amin'ny fanarenana an'i Jerosalema. Miverina amin'ny tanin'ny Jiosy dia miverina amin'Andriamanitra amin'ny alalan'i Jesoa Kristy izay manamboatra toerana ho antsika. Rehefa tafaverina ao amin'i Kristy dia banana fiainana mandrakizay".

Mialoha ny nirosoana tamin'ny fitokanana takelabato, dia nisy ny fintina ara-tantara ny fahafolo taona, izay na-taon'ny filohan'ny komity Atoa Andrianasolomanana Martin. Faniriana efa hatry ny ela ny hisian'ny fiangonana eto Ambodivonkely, tany FJKM



Ireo solotenan'ny Fitandremana Ankadifotsy teny amin'ny FJKM Ambodivonkely Fanavaozana

Analaroa tamin'izany no nivavaka. Noho ny fitomboan'ny kristianina sy ny alaviran-toerana, dia nisy ny favoriana natao tao an-tokantranon- dRabetokontany Emmanuel. Misaotra ny Tompo fa nivaly ny vavaka ka nahazo an'izao toerana izao, izay mirefy 60m x 50m nosandaina tamin'ny vidiny 1 tapitriza Ariary. Ny FJKM Fonohasina no nampianatra ny Soratra Masina, nitondra baiboly.

Ny 25 Novambra 2012 dia tonga tao ny mpitandrina Rakotobe Jaonarivo, nitondra herintaona ary nahatratra 167 teo no isan'ny mpiangona. Nandimby azy ny mpitandrina Fannezantsoa Solofohery Haja ny 2013-2014.

Ny 04 Novambra 2012 dia nisy ny fanirhana mpitandrina sady mpianatra teny amin'ny fakiolte teologika Ambatonakanga Randrianantaina Samuel Florent, sy ny 09 Novambra 2012 an'ny mpitandrina Razafimalala Bebinirina avy ao amin'ny FJKM Fonohasina Firaiana sy ireo birao avy any an-toerana. Nanao tafika masina izy ireo, ka tapaka tamin'izany ny hanangana vondron'olona mpiara-mivavaka ka 16 no isan'ny olona tamin'izany teo an-tokotanin-

dRabetokontany Emmanuel. Misaotra ny Tompo fa nivaly ny vavaka ka nahazo an'izao toerana izao, izay mirefy 60m x 50m nosandaina tamin'ny vidiny 1 tapitriza Ariary. Ny FJKM Fonohasina no nampianatra ny Soratra Masina, nitondra baiboly.

Ny 25 Novambra 2012 dia tonga tao ny mpitandrina Rakotobe Jaonarivo, nitondra herintaona ary nahatratra 167 teo no isan'ny mpiangona. Nandimby azy ny mpitandrina Fannezantsoa Solofohery Haja ny 2013-2014.

17 Mey 2014, niady fototra ny fiangonana niaraka tamin'ny fiangonana Ankadifotsy izay mirefy 20m x 10m, ny trano fisainana 8m x 4m. Ny 07 Desambra 2014 dia katekista délégue, Rtoa Raveloharisoa Clarisse, roa taona niasana tao amin'ilay fiangonana. Notokonana ny 21 Jolay 2016 ka 405 no mpiangona, 27

no diakona ary mpandray niisa 70 tamin'izany. Avy eo, nipe-traka teo Randriamisaona Émile mianakavy katekista délégue ny 03 desambra 2014 ha-tramin'ny 25 Agositra 2019.

Ankoatra ny diakona, dia nisy ihany koa ny sampana njoro toy ny Sekoly Alahady, dorkasy, STK, Fifohazana. Nisy ny fanaovana trano vadim-piangonana handraisana ny mpitandrina. Natao veloma ny katekista Randriamisaona Émile, ka tonga Andriamanossa Benjamina mianakavy hiasa tao, izy no nanome ny hira faneva, ftaovana lakoza, ary izy ihany koa no niady fototra amin'ny tsangambaton'ny lakoza izay mirefy 8m x 5m.

Ny Prezida synodal Rabetokotany Miarilaza Andriamialy, mpitandrina, no nanokana ny tsangambaton'izany folotaona FJKM Ambodivonkely Fanavaozana izany. Nisy ny hira niraisan'ireo mpitandrina sy katekista délégue. Taorian'izay dia nisy ny fandraisam-pitenenana nataon'ny solotenam-panjakana, ny filohan'ny komity, FJKM Fonohasina, FJKM Ankadifotsy ary ny prezida Synodal ka nomarihany tamin'izany fa ny sous-délégue Mamy Émile no mitondra ny fiangonana ankehitriny. Tsangambaton'ny FJKM Ambodivonkely Fanavaozana manaraka dia ny fitokanana lakoza.

Nisy ny fiaraha-misakafo sy fanapahana mofomamy ho fiarahana miombon-kafaliana tamin'izany jobily izany, noravahana hira nataon'ireo solotena mpitandrina sy fiangonana. Ianja R.

Tranomboky Sekoly Alahady Manampy ny ankizy amin'ny fianarana Soratra Masina

Raha tamin'ny endriny fitoeram-boky nobatabataina teo aloha, amin'izao fotoana kosa dia efa vita trano. Ny antom-pisian'ny tranomboky dia manampy ny ankizy amin'ny fianarana Soratra Masina, mampitombo fahalalana bebe kokoa ny momba an'Andriamanitra, mitarika ny ankizy hazoto mamaky boky hatrany. Afaka maka boky mandritra ny fampianarana, ary azo entina mody ihany koa, hoy Rtoa Andriamanantena Ravo Irène, tompon'andraikitra voalohany.

Ny alahady 1 Oktobra lasa teo no notokanana ny tranomboky ho an'ny Sekoly Alahady. Ny Mpitandrina Ravaloson no nitarika ny fitokanana, niaraka tamin-dRtoa vadiny sy ny filohan'ny sampana Sekoly Alahady. Tonga nanotrona izany ny mpitandrina Ranjakavola mivady, solotenan'ny biraom-piangonana, ny filohan'ny FLD, sy ireo filohan-tsampana rehetra.

Nandray fitenenana fohy ny Mpitandrina mirahalahy, ny filohan'ny sampana Rakotovao Rija Nivoson izay nitondra ny tenin'Andriamanitra nanorenana izany tranomboky izany. Araka izay hita ao amin'ny Ohabolana 40: 7 "Inty Aho tonga ao amin'ny horonam-boky no nanoratana ahy", araka ny tenin'ny filoha hatrany dia notanterahina ny fitokanana mba hahafahana mampiasa izany trano izany, izay sady trano fianarana ho an'ny sekolin'ny autiste.

Atoa Ramilison Abraham, sy Rtoakely Ramiliarisoa Sandrine no tompon'andraikitra manampy azy amin'izany asa izany. Marihina fa izy telo mianadahy ireo hatrany no niandraikitra ny momba ny boky, na tamin'ny endriny teo aloha na amin'izao fotoana. Tsara homarihina ihany koa fa boky ara-tsoratra Masina avokoa no hita ao,nofaranana tamin'ny fanapahana sy fizarana mofomamy ny fotoana.

Eto am-pamaranana, Rtoa Andriamanantena Ravo Irène dia manentana ireo ankizy sy tanora ho tia mamaky boky, fa manampy betsaka amin'ny fitomboan'ny fahalalana, sy ny finoana ary fana-rahana ny Tompo izany, ary misaotra ireo rehetra tonga nanotrona izany fotoana izany.

Malala Andrinainaina



Ireo tomponandraikitra ny toerana famakiamboky.

Hamarana ny faha-35 taonany

Manomana ny hetsika famaranana ny fankalazana an'Andriamanitra noho ny faha-35 taona ny Mpamaky Teny Ankadifotsy izay hatao ny alahady 26 Novambra 2023. Fiderana manaka-danitra, fiderana miavaka ao anatin'ny litorjia hampihainina no entina maneho ny voninahitr'Andriamanitra. Izany dia iarahana amin'ny Prezida syndical Iarivo Avaradrano Atoa Rabetokotany Miarilaza Mpitandrina.

Marihina fa amin'io fotoana io no hanolorana ny tsangambato "studio d'enregistrement" entina manao raki-peo ny fandaharana Hazoto hamaky baiboly isan'andro izay mandeha ao amin'ny radio Fahazavana sy ny Perikopa audio, zaraina amin'ireo fitandremana hampiofanina. Ny tolakandro kosa dia Antsan-kira lehibe iiarahana amin'ny Tarika Rojo Ny Avo izay hanasana ny mpianakanvin'ny finoana hanatrika izany.



Ireo mpiofana tao amin'ny FJKM Rasalama Manjakaray.

Fampiofanana teny amin'ny FJKM Rasalama Manjakaray

Resy lahatra ny Mpitandrina Rajaonarison Rado Fano-mezantsoa fa "Aina" ho an'ny fanompoam-pivavahana ny valiteny ka nanomboka ny sabotsy 14 Oktobra 2023 ka nifarana ny sabotsy 28 Oktobra 2023 ny fampiofanana famakiana Soratra masina tao amin'ny FJKM Rasalama Manjakaray.

Nambaran'ny ihany koa fa fitarihana ny fiangonana

hihavao hatrany fa tsy han-deha amin'ny fahazarana fotosiny ihany ny mandray ny fampiofanana. Mifanindran-dalana amin'ny vinan'ny Mpamakiteny Ankadifotsy izany dia ny ho Vakiteny Marina, Miaina, Mazava ary mba ho azon'ny mpihairo sahadys ny toriteny. Ao-rian'ny fiofanana dia hiezaka izy ireo ny hivelatra hahatratra ny Fiangonana manontolo, ka ny Sampana, sampan'asa, asa ary Fikambana dia hanaraka ny la-

mina hapetraky ny mpan-drindra sy ny mpitarika.

Tafatsangana tamin'io fotoana io ihany koa ny birao vao-vao 10 mianadahy hitantana ny Mpamakiteny ao an-toerana.

Ireo birao voafidy :

- Filoha : RAPHAELSON Antsonaina
- Filoha mpanampy : RALSONZAKA Eloi
- Mpitantsoratra :
 - RAZAFITRIMO Nivo Hanitra
 - RAZAFINDRAMIARANA Mbola Lalaina
- Mpitahiry vola : RAMIARANJATOVO Victoline
- Mpitantsoraty ny vola : RAVOARISOA Juliette
- Mpanolotsaina :
 - RAFARAHARIVOLA Herisoa
 - RAKOTOMANGA Norvololona Julie
 - RASOLOMANANA Maurice
 - RATSITOROANA Jean Frédérique

Rojo Ramaro

HAFATRA FOHY

Hoy ilay Dadatoanay
hoe: ampianaro ihany ny
ankizy leiretsy à ! Fa na sa-
natria hangalatra aza, hafa
ihany ny mahay !

Rabekely



FIKARAKARANA
voninkazo

Ireo tompon'andraikitra mikarakara
voninkazo amin'ity volana NOVAMBRA
2023 ity :


- 04 novambra : groupe 17
- 11 novambra : groupe 18
- 18 novambra : groupe 19
- 25 novambra : groupe 20

Nanangona Malala Soa

Fifidianana : misafidy olona, hevitra sa fiaianana

Jery todika, fanazavana na fandotoana fanahy

Voly maro, velaran'ala midadasika, ranomasina makadiry no lazan'ny nosy Madagasikara fahizay.



Lasa tsy fanadino no tansaina, isaky ny mahombry amin'ny fanantaneraha vina. Ankafizina sy tsihifina ery ny fary mamy fanahy. Tany lonaka, tany mafana no tian'ny voly fary ka ahazoana ny fahamian'ny fanahiny. Mandray anjara betsaka ny masoandro amin'ny haza-vana sy hafanana ilain'ny vokatra, tahaka ny lavanila koa. Ny aty fanahy avokoa no mahamaika rehefa haka ny tsirony. Ny hodiny na dia tsy ariana aza dia tsy mahaleo ny nofo anatiny. Ny zanaka no mendrika noho ny fanabeazana azony tamin'ny raiamandreny, tamin'ny sekoly, tamin'ny impi-taiza ara-panahy, fianganana sy ny sampana ary ny fikambanana isan-karazany. Ny miseho ivelany dia tsy voatery mitovy amin'ny anaty tsy hita.

Misy ny fotoana hanadinoana ny lasa mbà hizana izay mahaso ho an'ny hafa sy ny fiafahana-monna. Ny finiavana, ny fitiavana sy ny fahaiza-manao ary ny fahaizana mitondra tena no mitera-boka-tsoa. Manana anjara toerana lehibe ny zava-misy. Misy ny fomba sy fitaovala manampy hamantarana sy hifehezana ny zavatra iainana. Ao ny fanangonan-kevitra « sondage, enquête » izay manampy, ankoatra ny toro-hevitra avy amin'ny mpanolotsaina, ny haino amanjery, ny boky sy ny atrikasa isan-karazany.

Tsy ariana tanteraka ny lasa nisy. Mitombina ilay hoe atokisana amin'ny kely dia manapaka ny be. Hita io na amin'izay manao zavatra ilaina sy mampan-droso, fa koa amin'izay manao fihetsika sy manana fiaianana ary fiaianana tsy mitondra soa. Karamaina mihintsy moa ny mpamono olona « tueur à gages », safidiana amin'ny mason-tsivana sarotra, omena ka-

rama avo dia avo. Samy atokisana amin'ny traikera na ny manao tsara na ny manao ratsy. Ny mpinamana mi-fankafantatra dia mifampatoky, amin'ny vina sy amin'ny tetika iarahana. Rehefa mifankahita ny mora

sy ny sarotra ary ny toetra tsara sy ratsy, dia sarotra mifandao ny namana. Raha haka fapanahan-kevitra dia izay tsara no angamba tsara tazonia. Mandomitra fahazavana ny teti-dratsy, ny bitsibitsika, ny fitokotokoana, ny faminganana ary ny fiokoana sy ny fanakorontanna. Tsy hita raha tsy efa mipoaka ny asa ratsy izay tsy kely lâlana. Tsy mitovy fomba tokoa ny mpihevi-dratsy mpamitaka, sy ny mandeha amin'ny fahamarinana izay mandeha amin'ny mazava. Miantoka amin'ny fahaizana mamoy izay namana ratsy ny fahombiazan'ny vina hanao

tsara. Misy tokoa ny namana manolobato mafana sy mitondra ho amin'ny lâlana ratsy.

Malaza izao ny lohahevitra : mpamiany sandoka izay miantso, mitory sy mampianatra ny Tenin'Andriamanitra ho amin'ny tanjona tsy mikendry ny dera, laza sy voninahitra ho an'Andriamanitra. Ny Teny maha-Izy an'i Jesoa no namorona sy nanaovana ny zavatra tsara rehetra ; « Ary Andriamanitra nanao hoe : Misia mazava ; dia nisy mazava. Ary hitan'Andriamanitra fa tsara ny mazava ; ary nampisarahin'Andriamanitra ny mazava sy ny maizina. » - Genesisy 1 :3-4. Ny mpanompo mahaso no mendrika, satria mitsinjo ary manao izay hisian'ny mazava sy ny tsara amin'ny manodidina azy.

“Fa amin’ny firenena rehetra, izay olona matahotra Azy ka manao ny marina no ankasitrahany”-Asa 10:35

Misy fiteny maro eto amin'izao tontolo izao, ao ny teny nindramina, ao ny teny gasy ao ny teny frantsay, ao ny teny sinoa, ao ny teny ratsy ary ao ny teny

mamy. Fa iza tokoa no mahavita, amin'ny fotoana rehetra, tsy manavaka toerana sy olona, tsy miteny afatsy teny filazantsara. Iantsoana ny kristiana io, indrindra fa ny kristiana te-ho tomponandraikitra sy te-hanaparitaka soa amin'ny manodidina azy. Fahoram-panahy be rehefa te-hanao zavatra tsara, te-hihazakazaka mbà hahazo ny satroboninahitra any an-danitra, nefo mandà ny nofo, mitarika amin'ny ratsy. Mahory izany hoe tsy ho anisan'izay hiaina ny fiaianana mandrakizay. Ny satroboninahitra moa tsy ho azo raha tsy amin'ny fanomezana voninahitra an'Andriamanitra amin'ny alalan'ny saina, ny teny sy ny fi-hetsika.

Fanontaniana azo apetraka manoloana ny vata fandatsaham-bato ny hoe : miteny teny inona ny mpikabary miezaka mandresy lahatra. Miavaka amin'ny maizina ny mazava, tsy afaka miaraka. Raha ny teny

fotsiny no henoina dia mety ho voafitaka. Ny toetra dia tahaka ny panda vadin-koditra, nefo azo ovaina ihany, fa rehefa tsy te-hiova moa dia na efa eo i masom-bahoaka aza, dia mbola manohy sy mitoto amin'ny fomba ratsy. Toerana anisany sarotra ahafahana miaiky fa diso lâlana ny asan'ny filohan'ny firenena iray.

Hifidy, sa tsy hifidy. Mifidy satria manana andraitra mbà hitondra soa, asa handraisana anjara ny fiaianana, mbà handrosoana ho any amin'ny fahasbarana sy ny fiadanana, nofy hatrizao. Mbà ho rehareba sy ho voninahitra ho an'Andriamanitra i Madagasikara !

« Ray ô ! mba faniriako raha toa ka sitrakao, ny ho zanaka manoa feno fahendrena

Hilofo hatrany koa hamita ireo asanao, ka tsy hi-rehareha fa hanetry tena. » - Fihirana fanampiny 39 Jocelyn R.

Irako Andriamahazosoa Ammi Jobily fisotroan-dronono sy faha-40 taona maha-mpitandrina

Fa i Kristy no anton'ny ahavelo mako, ary ny fahafatesana no hahazoako tombony », izany no fanambaram-pinoana lehibe iombonan'ny mpitandrina Irako Andriamahazosoa Ammi mivady miaraka miaraka amin'i Paoly Apostoly ao anatin'izao taom-pankalazana izao

Ny sabotsy 14 Oktobra 2023, tao amin'ny Sehatra maitso Antsahamanitra, no natanterahina ny fanompoampivavaha ho fisaorana sy fiderana an'Andriamanitra noho ny fanokafana ny jobilin'ny filohan'ny FJKM Dr Irako Andriamahazosoa Ammi, Mpitandrina sy ramatoa vadiny.

Antsam-piderana no namobohana ny fotoana, izay notanterahin'ireo antoko mpihira, dia ny tao amin'ny FJKM Zoara Ambohipo, Ambohinaina, Ifarihy Famonjena, Ambatonakanga, Afaka Ankadikely Ilafy, Hosana Ambohijatovo Fitiavana, AMAF Andravoahangy Fivavaha, ny Koraita Manarintsoa Fi noana.

Nitarika ny fotoana, Andriamatoa Lovaso Hasina Ramantsalam, Mpitandrina Filoha Mpanampy Komity Jobily, ary ny nitondra ny hafatra kosa dia Andriamatoa Dodaheriso Rakotobe Rajamanjato, Mpitandrina, Birao MPIANDRAIKITRA Foibe.

Nisy ihany koa ny fampiaranana ny hira fanevan'ny fisotroan-dronono izay niarahana tamin'ny Antoko Mpihira tao Ambatonakanga



Fanokafana ny taon-jobily tao Antsahamanitra.

Isaorana antsika mialoha !

“Fa Andriamanitra tsy mba tsy marina hanadino ny asanareo sy ny fitiavana izay nasehonareo ho voninahitry ny anarany, raha nanompo ny olona masina ianareo sady mbola manompo ihany” Hebreo 6 : 10

Fintin'ny tantaram-panom-poana nandritra ny 40 taona (1985 - 2025)

- **Aogositra 1985 :** Niranina ho Mpitandrina FJKM izahay mivady taorian'ny fianaranana nandritra ny 5 taona tao amin'ny Faculté de Théologie Ambatonakanga, ka ny mpitandrina Esther no vehivavy voalohany nahazo ny maripahaizana Maître en Théologie tao tamin'izany. Dia voatendry tao amin'ny Seminera tao Amparibe izahay : ny Pr Ammi ho Talen'ny Seminera, ny Pr Esther ho

Mpiandraikitra ny Mpianatra ; Oktobra izahay : Tale ! Dia sady nitondra ny Seminera no Mpianatra ny Taranja

“Metôdôlôjjan'ny fikarohana” voalohany tao amin'ny Faculté de Théologie Ambatonakanga

- **Aprily 1988 :** Notendren'ny Mpianatra Foibe ny tsy haha Mpampianatra rai-kitra an'ny Mpitandrina Ammi tao amin'ny Faculté de Théologie Ambatonakanga, ka voatendry hitondra ny FJKM Andronundra Fahasoavana SP Antananarivo Atsimo izy. Ny mpitandrina Esther kosa mbola nanohy ny fitondrana ny FJKM Ranovao Maritiora hatrany, sady nifanampy tamin'ny fitondrana ny Fianganana tao Andronundra.

- **Jolay 2001 :** Nomen'ny Foibe FJKM lalana handeha ho any Angletera ny mpitandrina Ammi ka sady nanatrina ny teny anglisy no nanaraka fampianarana vitsivitsy tao amin'ny Université i Birmingham sy Crowther-Hall.

- **Novambra 2002 :** Nony tafaverina teto Madagasikara, dia notendrena ho Mpampianatra matihanina tao amin'ny Faculté de Théologie Ambatonakanga ny mpitandrina Ammi ka sady lehiben'ny Departementant'ny Teolojia, Pratika no nampianatra, Teolojia Pratika sy Tantaram-pivavaha ary Misiolôjia. Izany naha Mpampianatra Misiolôjia izany no nitondrany mpianatra nandeha nanorina ny FJKM Vondrozo Farafangana. Ny mpitandrina Esther nanohy ny fitondrana ny FJKM Ranovao Maritiora.

- **January 2005 :** Neken'ny Mpianatra Foibe ny tsy haha Mpampianatra rai-kitra an'ny Mpitandrina Ammi tao amin'ny Faculté de Théologie Ambatonakanga, ka voatendry hitondra ny FJKM Andronundra Fahasoavana SP Antananarivo Atsimo izy. Ny mpitandrina Esther kosa mbola nanohy ny fitondrana ny FJKM Ranovao Maritiora hatrany, sady nifanampy tamin'ny fitondrana ny Fianganana tao Andronundra.

Noho ny fahasoavan'Andriamanitra : voaorina ny FJKM Morafeno Katsepy, voatsangana ny Sekoly Faha-soavana, nirosoana ny fanoreana ny trano fianganana lehibe vaovao. Vola 2 miliara Fmg teo ho eo no efa lany na-naovana io, raha niala tao izahay. Ny fanahin'ny fahafoziana manontolo no hahazoana izany. Tsy nisy “opération”, na iray aza ! Tsy nisy “billet”, na iray aza ! Tsy nisy fampisehoana natao, na dia iray aza ! Tsy nisy mpamatasy vola ivelany, na iray aza ! Rakitra, Rodorodom-pahasoavana, Tolotra an-tavoahangy, Tolotra tamin'ny vilany tany, Fahafolonkarena sy voady ary rakitra sy voka-dehibe no naboloran'ny vahoakan'Andriamanitra tamin'ny fitiavana, nenti-nanana ny asa !

- **Aogositra 2016 :** Na tsy nosainina sy tsy niriana aza, dia voafidin'ny Synoda lehibe FJKM faha-18 tany Antsirabe ho Filohan'ny FJKM ny Pr Ammi. Natao Jobily fisotroan-dronono teny amin'ny FJKM Ranovao Maritiora ny mpitandrina Esther ny taona 2017 mba ho afa-miara-miatrika ny asa maha Filohan'ny FJKM azy roa, rehefa nitondra tao nandritra ny 18 taona !

- Aogositra 2021 : Voafidy fanindroany ho Filohan'ny FJKM tany amin'ny Synoda Lehiben'ny FJKM faha-XIX tany Sambava ny mpitandrina Ammi. 4 taona, (izay hifarana amin'ny Aogositra 2025 any Taolagnaro, raha sitrapon'ny Tompo) no nifidinan'ny Synoda Lehibe azy hitana izany andraikitra izany ka mahatonga izao firosoana ho amin'ny Jobily fisotroan-dronono izao.

Nanangona Hanitra Mala Soa

Fanompoana an-tsary



Alahadin'ny Mpanabe, natao teto amin'ny FJKM Ankadifotsy.



Izy mianadahy Mpianatra eto amin'ny Fitandremana Ankadifotsy.



At Ny sampana Sekoly Alahdy tany amin'ny SPIA.



Fanolorana ny tsangambato faha-125 taonan'ny STK.



Lanonana famaranana ny faha-125 taonan'ny STK.



Fankalazana ny Herinandron'ny SAFIF.